



CLEMENS PAPA X.

AD PERPETVAM REI MEMORIAM.



N Apostolica dignitatis fastigio, ad quod ineffabilis Divinæ Clementiæ abundantia humilitatem nostram nullo meritorum nostrorum suffragio euehere dignata est, Pastoralem sollicitudinem Ecclesiæ Catholicæ Nobis creditæ omni studio, quantum Nobis ex alto conceditur, repræsentare iugiter satagentes, pia fidelium, præsertim sublimium Principum præclaris in Ecclesiam Dei meritis fulgentium, & Religiosorum virorum propriæ alienæque saluti laudabiliter incumbentium, vota ad augendam in terris Beatorum in Coelis regnantium venerationem readentia, libenter exaudimus, sicut ad Omnipotentis Dei, & Patris Domini Nostri Iesu Christi, qui electos suos deuotione supra ætatem, & virtute supra naturam instituit, gloriam, sanctæque Ecclesiæ decus, & spiritualem fidelium ædificationem salubriter expedire in Domino arbitramur. Itaque gloriosa B. STANISLAI KOSTKA, Poloni Societatis IESV merita, deuota consideratione, magnoque cum spirituali animi nostri gaudio recollectentes, ac pijs enixisque Charissimi in Christo filij nostri Michaëlis Polonia Regis Illustris, & dilectorum filiorum Præpositi Generalis, & Presbyterorum dictæ Societatis precibus Nobis humiliter porrectis fauorabilem assensum præbere cupientes, ipsorumque Præpositi Generalis, & Presbyterorum singulares personas a quibusvis excommunicationis, suspensionis, & interdicti, alijsque Ecclesiasticis sententijs, censuris, & pœnis à iure, vel ab homine, quavis occasione, vel causa latis, si quibus quomodolibet innodatæ exiunt, ad effectum præsentium dumtaxat consequendum, harum serie absoluentes, & absolutas fore censentes, de venerabilium fratrum nostrorum S. R. E. Cardinalium sacris Ritibus præpositorum consilio, vt de dicto B. STANISLAO KOSTKA quotannis die xij. Nouembris in vniuerso Regno Poloniæ, & magno Ducatu Lithuanicæ, nec non in Ecclesia Sancti Andree in Monte Quirinali huius Almæ Vrbs nostræ vbi eiusdem B. STANISLAI corpus requiescit, ac omnibus, & singulis Ecclesijs dictæ Societatis IESV, Missa, etiam à Sacerdotibus eo die ad Ecclesias huiusmodi confluentibus, & a Religiosis eiusdem Societatis vbicumque terrarum existentibus celebrari, & Officium recitari de Communi Confessorum non Pontificum, iuxta Rubricas Breuiarij, & Missalis Romani, liberè, & licetè possint, & valeant, auctoritate Apostolica tenore præsentium perpetuo concedimus, & indulgemus. Non obstantibus Constitutionibus, & Ordinationibus Apostolicis, ceterisque contrarijs quibuscumque. Volumus autem vt eorundem præsentium Litterarum transumptis, seu exemplis, etiam impressis, manu Secretarij dictæ Societatis, vel Notarij publici subscriptis, & sigillo alicuius persone in Ecclesiastica dignitate constitutæ, vel Præpositi, aut Vicarij Generalis eiusdem Societatis pro tempore existentis munitis, eadem profusus fides in iudicio, & extra iudicium vbique locorum habeatur, quæ haberetur ipsis præsentibus, si forent exhibitæ, vel ostensæ. Datum Romæ apud Sanctam Mariam Maiorem sub Annulo Piscatoris, die xv. Augusti M. DC. LXX. Pontificatus Nostri Anno Primo.

I. G. Siusus.

Hieronymus Cattaneus, Secr.

ROMÆ, Ex Typographia Reuerendæ Cameræ Apostolicæ. M. DC. LXX.

